

後村別調一卷

劉克莊

後村別調

目錄

湘江紅十四調
浪淘沙四調
沁春園五調
卜算子二調
最高樓二調
清平樂四調
玉春樓一調
鵲橋仙一調
哨徧一調
摸魚兒一調
鷓鴣天二調
念奴嬌二調

風入松四調
念奴嬌三調
摸魚兒二調
一翦梅一調
臨江仙四調
長相思五調
生查子一調
踏莎行一調
賀新郎二十一調
一翦梅一調
卜算子一調

水龍吟四調
六州歌頭一調
賀新郎九調
木蘭花慢三調
昭君怨二調
菩薩蠻一調
憶秦娥五調
水調歌頭九調
沁園春四調
滿庭芳一調
木蘭花慢一調

後村別調目錄終

後村別調

宋 劉克莊

滿江紅（夜雨涼甚，忽動從戎之興）

金甲瑠戈，記當日、轅門初立。磨盾鼻、一揮千紙。龍蛇猶溼。鐵馬曉嘶營壁冷。樓船夜渡風濤急。有誰憐、猿臂故將軍，無功級。平戎策，從軍什。零落盡，慵收拾。把茶經香傳，時時溫習。生怕客談榆塞事，且教兒誦花間集。嘆臣之壯也不如人，今何及。

又（三月二十四夜飲海棠花下作）

老子年來，頗自許、心腸鐵石。尙一點、消磨未盡。愛花成癖。懊惱每嫌寒勒住。丁寧莫被晴烘拆。奈暄風、烈日太無情，如何得。張畫燭、頻頻惜。憑素手、輕輕摘。更一番雨過，彩雲無迹。今夕不來花下飲，明朝空向枝頭覓。對殘紅、滿院杜鵑啼，添愁寂。

又（范尉梅谷）

赤日黃埃，夢不到、清溪翠麓。空健羨、君家別墅。幾株幽獨。骨冷肌清偏要月。天寒日暮尤宜竹。想主人、杖屨繞千迴，山南北。寧委濶、嫌金屋。寧映水、羞銀燭。歎出羣風韻，背時裝束。競愛東鄰姬傅粉，誰憐空谷人如玉。笑林逋、何遜漫爲詩，無人讀。

又（送宋惠父入江西幕）

滿腹詩書。餘事到穰苴兵法。新受了烏公書幣。著鞭垂發。黃紙紅旗。喧道路。黑風青草空巢穴。向幼安宣子頂頭行。方奇特。谿峒事。聽儂說。龔遂外。無長策。便獻俘非勇。納降非怯。帳下健兒。休盡銳。草間赤子。俱求活。到崆峒。快寄凱歌來。寬離別。

又

落日登樓。誰管領。倦游狂客。待喚起滄浪漁父。隔江吹笛。看水看山身尙健。愛晴憂雨頭先白。對暮雲。不見美人來。遙天碧。山中鶴。應相憶。沙上鷺。渾相識。想石田。茆屋草深三尺。空有鬢如潘騎省。斷無面見陶彭澤。便倒傾海水。浣衣塵。難湔滌。

又(送王實之)

天壤王郎。數人物。方今第一。談笑裏。風霆驚座。雲煙生筆。落落元龍湖海氣。琅琅董相天人策。問如何。十載尙青衫。諸侯客。易愛底。些官職。難保底。些名節。擬閉門投轄。劇談三日。疇昔評君天下寶。常爲天下蒼生惜。向臨分。慷慨出商聲。摧金石。

又(送王實之)

鶴馭來時。長占定。一年清絕。九萬里。纖雲收盡。帝青空闊。月露偏爲丹桂地。風霜欲放黃花節。聽玉笙。縹緲度巖山。吹初徹。曾直把。龍鱗批。曾戲取。鯨牙拔。向絳河濯足。咸池晞髮。俗子底量吾輩事。天仙不在臞儒列。世豈無瑤草與蟠桃。堪攀掇。

又（和王實之韻送鄭伯昌）

怪雨盲風。留不住江邊行色。煩問信。冥鴻高士。釣鰲詞客。千百年傳吾輩話。二三子繫斯文脈。聽王郎一曲玉簫聲。淒金石。晞髮處。怡山碧。垂釣處。滄溟白。笑而今拙宦。它年遺直。只願長留相見面。未宜輕屈平生膝。有狂談欲吐。且休休。驚鄰壁。

又（四首並和實之）

往日封章。曾簪動君王玉色。今似得三閭公子。四明狂客。古不能箝言者口。天方欲壽中朝脈。算人間豈有病無醫。須鍼石。年冉冉。袍猶碧。心耿耿。頭先白。笑臣舒迂緩。臣山愚直。拂袖歸來。羞炙手。望塵拜了。難伸膝。把富春瀨。與首陽山。圖齋壁。

又

三黜歸來。飯蔬食。渾無慍色。中年後。家如旅舍。身如行客。軒冕豈非龐贅具。煙霞已是膏肓脈。有些兒。隙地更疏泉。堆卷石。隣媼餉。新菽碧。溪友賣鮮鱗。白向陳編冷笑。孔明元直。俗事不教汗兩耳。燕居聊可經雙膝。取常年行脚一枝筇。懸高壁。

又

疇昔臚傳。仗下奏祥雲五色。何況是西山弟子。鷗山賓客。上帝照臨忠義膽。老師付受文章脈。問此君髭髯似何人。徂徠石。園官菜。登盤碧。田舍米。翻匙白。懶投詩見素。寄書杓直。德耀不

嫌爲隱髻。龜兒已解搖吟膝。有誰憐給札老相如。家徒壁。

又

下見西山料它日面無慚色。君記取不爲呂黨亦非秦客。（檢有十客）有意挽回當世事。無方延得諸賢脈。笑海波渺渺幾時平。空啣石。園五畝。紛紅碧。家四世。傳清白。任天孫笑拙女。須嫌直。老去何煩援以手。向來不要加諸膝。待深山深處著茆齋。看青壁。

又（壽唐夫人）

八十加三人。盡訝還童返少。爭信道夜春曉。纖總曾經了。凜凜共姜當日誓。諄諄孟母平生教。到如今象服擁魚軒。天之報。如船藕。如瓜棗。斑衣舞。金鐘酌。望秋宵一點。老人星照。塵世少如孃福壽。上蒼知得兒忠孝。待看它孫子又生孫。添懷抱。

又（和吳叔永尙書時吳喪少子）

著破青鞵。渾不憶。踢它龍尾。更冷笑癡人。擘劃。二三百歲。殤子彭錢誰壽夭。靈均漁父爭醒醉。向江天極目羨禽魚。悠然矣。杯中物。姑停止。牀頭易。都拋廢。慨事常八九。不如人意。白雪調高尤協律。落霞語好終傷綺。待煩公老手一摩挲。文公記。

風入松（福清道中作）

藁泉夢斷夜初長。別館淒涼。細思二十年中事。歎人琴已矣俱亡。改盡潘郎鬢髮。銷殘荀令衣。

香。多年布被冷如霜。到處同牀。簫聲一去無消息。但回首天海茫茫。舊日風烟草樹。而今總斷人腸。

又(同前)

歸鞍尙欲小徘徊。逆境難排。人言酒是銷憂物。奈病餘孤負金罍。蕭瑟搗衣時候。淒涼鼓缶情懷。遠林搖落晚風哀。野店猶開。多情惟是燈前影。伴此翁同去同來。逆旅主人相問。今迴老似前迴。

又(癸卯至石塘追和十五年前韻)

殘更難睡抵年長。曉月淒涼。芙蓉院落深深閉。歎芳卿。今在今亡。絕筆無求凰曲。癡心有返魂香。起來休謁鬢邊霜。半被堆牀。定歸兜率蓬萊去。奈人間無路茫茫。緣斷漫三彈指。憂來欲九迴腸。

又(同前)

攀翻宰樹暫徘徊。草草安排。昔人徒步陳雞絮。愧公家僕馬觥罍。華表舊愁滿目。黃梁殘夢傷懷。欲將莊列等歡哀。對卷慵開。憑高指點虛無路。問何年遼鶴歸來。宿酒得風漸解。小輿待月同迴。

水龍吟(己亥自壽)

年年歲歲今朝。左弧懸罷。渾無事。吾衰久矣。我辰安在。老之將至。懶寫京書。怕看除目。敗人佳思。把東籬掩定。北窗開了。悠然酌。頽然睡。客有過門投贄。道先生訪華胥氏。誰能辛苦陪它綺語。記它寄字。屈指先賢。戴花老監。豈其苗裔。待異時約取。寬夫彥國。入耆英會。

又

先生放逐方歸。不如前輩抽身早。臺郎舊秩。看來俗似。散人新號。起舞非狂。行吟非怨。高眠非傲。嘆終南捷徑。太行盤谷。用卿法。從吾好。閉了草廬長嘯。後將軍來時。休報牀頭書在。古人出處。今人非笑。製箇淡詞。呷些薄酒。野花簪帽。願雲臺任滿。又還因任。賽汾陽考。

又（自和前韻）

病翁一榻蕭然。（劉屏山號病翁）不知世有歡娛事。雀羅庭院。載醪客去。催租人至。報答秋光。要些酒量。要些詩思。奈長鯨罷吸。寒蛩息響。茶甌外。惟貪睡。窮巷幸無干贄。或相過。莫知誰氏。柴門草戶。闕人守舍。任伊題字。自和山歌。國風之變。離騷之裔。待從今向去。年年強健。插花高會。

又

平生酷愛淵明。偶然一出歸來早。題詩信意。也書甲子。也書年號。陶侃孫兒。孟嘉甥子。疑狂疑傲。與柴桑樵牧。斜川魚鳥。同盟後。歸于好。除了登臨吟嘯。事如天莫相諮報。田園閒靜。市朝

翻覆回頭堪笑。節物催人。東籬把菊。西風吹帽。做先生處士。一生一世。不論資考。

浪淘沙（旅況）

紙帳素屏遮。全似僧家。無端霜月闌窗紗。喚起玉關征戍夢。幾疊寒笳。歲晚客天涯。短髮蒼華。今年衰似去年些。詩酒新來都減價。孤負梅花。

又

疊嶂碧周遮。游子思家。掩藏白髮賴烏紗。落日倚樓千萬恨。社鼓城笳。老去淡生涯。虛擲年華。臘茶孟子太清些。待得癡兒公事畢。謝了梅花。

又（丁未生日）

去歲詣公車。天語勤渠。絳紗玉斧照寒儒。恰似昔人曾夢到。帝所清都。骨相太清臞。謫墮須臾。今年黃勅換稱呼。只爲此翁霜鬢禿。老不中書。

又

早歲類寒蛩。晚節遭逢。曾開黃卷侍重瞳。歸去青藜光照牖。階藥翻紅。出畫頗匆匆。主眷猶濃。除官全似紫陽翁。（寶文漳州）換箇新衙頭面改。又似包公。（辭郡得小龍）

念奴嬌（木犀）

繞籬尋菊猶遲。舍北芙蓉渾未。卻是小山叢桂裏。一夜天香飄墜。約束奴兵。丁寧稚子。莫掃

歎。

沁園春（夢方孚若）

何處相逢。登寶釵樓。訪銅雀臺。喚廚人斫就。東溟鯨膾。圍人呈罷。西極龍媒。天下英雄。使君與操。餘子誰堪共酒杯。車千乘。載燕南代北。劍客奇才。飲酣鼻息如雷。誰信被晨雞催喚回。嘆年光過盡。功名未立。書生老去。機會方來。使李將軍。遇高皇帝。萬戶侯何足道哉。推衣起。但淒涼感舊。慷慨生哀。

又（送包尉）

我羨君歸。一路秋風。芙蓉木犀。想慈顏望久。靈烏乍噪。新眉畫就。郎馬頻嘶。忙脫征衫。快呼斗酒。細與家人說建谿。情知道。這中年懷抱。生怕分攜。丈夫南北東西。應笑殺離筵。粉淚啼悵。佳人來未。碧雲冉冉。王孫去後。芳草萋萋。明日相思。山長水複。古道人稀。茆店雞。元龍老。有高樓百尺。誰共登梯。

又（寄鍾賢良）

我夢見君。帶飛霞冠。著宮錦袍。與牧之高會。齊山風月。謫仙同載。采石雲濤。萬卷星羅。千篇電掃。不學窮兒賦楚騷。掀髯處。有魚龍起舞。狐兔悲鳴。英雄埋沒。蓬蒿暗摸。索當年劉與曹。嘆事機易失。功名難偶。誅茅西嶺。種秫東皋。柵有雞豚。庭無羔雁。不是先生索價高。人間窄。待相

期海上共摘蟠桃。

又（贈孫季蕃）

歲暮天寒一見飄然。幅巾布裘。儘侵雲鳥道。躋攀絕頂。拍天鯨浸。笑傲中流。疇昔期君。紫髯鐵面。生子當如孫仲謀。誰知道。到中年猶未。建節封侯。南來萬里何求。因感慨喬公成遠遊。悵名姬駿馬。都如昨夢。隻雞斗酒。難到新邱。天地無情。功名有數。千古英雄只麼休。平生獨。羊曇一個。淚灑西州。

又（寄九華葉賢良）

一卷陰符。二石硬弓。百斤寶刀。更玉花驄。噴鳴鞭電抹。烏絲闌展。醉墨龍跳。牛角書生。虬鬚豪客。談笑皆從折簡招。依稀記。曾請纓係粵。草檄征遼。當年目視雲霄。誰信道。淒涼今折腰。悵燕然未勒。南歸草草。長安不見。北望迢迢。老去胸中。有些磊塊。歌罷猶須著酒澆。休休也。但帽邊鬢減。鏡裏顏凋。

摸魚兒（賞海棠）

甚春來冷煙淒雨。朝朝遲了芳信。驀然作暖晴三日。又覺萬殊嬌困。天怎忍。潘令老不成也沒看花分。才情減盡。悵玉局飛仙。石湖絕筆。孤負這風韻。傾城色。懊惱佳人薄命。牆頭岑寂。誰問東風日暮無聊賴。吹得胭脂成紛。君細認。花共酒。古來二事天猶吝。年光去迅。漫綠葉成陰。

蒼苔滿地。做取異時恨。

又（感嘆）

怪新來倚樓看鏡。清狂渾不如舊。暮雲千里傷心色。那更亂蟬疏柳。凝望久。愴故國百年漢闕。誰回首。功名大謬。歎采藥名山。讀書精舍。此計何時就。封侯事久矣。輸人妙手。遍舟聊作漁叟。高冠長劍。都閒物。世上切身惟酒。千載後。君試看。拔山扛鼎俱烏有。英雄骨朽。問顧曲周郎。而今還解。來聽小詞否。

賀新郎（觀抓髯）

絕頂規危榭。跨高寒。烏飛不過。雲生其下。斤斲無聲人按堵。翕忽青紅變化。覽城郭山川如畫。開老鳳樓修造手。笑談閒。突出凌雲廈。臺上景。買無價。唾壺塵尾登臨暇。似當年。文章太守。歐陽公也。傾倒贛江供硯滴。判斷雪天月夜。更喚取鄒枚司馬。銅雀淩波歌舞罷。訪殘碑。斷甃無存者。餘翰墨。被風雅。

又（春景）

動地東風起。畫橋西繞溪桑柘。漫山桃李。寂寂牆陰蒼苔路。猶印前回屐齒。驚歲月。飄馳雲駛。太息攀翻長亭樹。是先生。手種。今如此。君不樂。欲何俟。傍人錯會淵明意。笑斯翁。皇皇汲汲。登山臨水。佳處徑呼籃輿去。彷彿柴桑栗里。從我者。門生兒子。嘗試平章先賢傳。屈原醒不似。

劉伶醉判茗芋臥花底。

又(芍藥)

一夢揚州事。畫堂深金瓶萬朵。元戎高會。座上祥雲層層起。不減洛中姚魏。嘆別後關上迢遞。國色天香何處在。想東風猶憶狂書記。驚歲月。一彈指。數枝清曉煩馳騎。向小窗依稀重見。蕪城佳麗。料得花憐儂消瘦。儂亦憐花憔悴。漫悵望竹西歌吹。老矣應無騎鶴日。但春衫點點。當時淚。那更有舊情味。

又(送陳子華赴真州)

北望神州路。試平章這場公案。向誰分付。記得太行兵百萬。曾入宗爺駕御。今把作握蛇騎虎。君去東京豪傑喜。看投戈下拜真吾父。談笑裏。定齊魯。兩淮蕭索惟狐兔。問當年祖生去後。有人來否。多少新亭揮淚客。不夢中原塊土。這事業須由人做。堪笑書生心膽怯。向車中閉置。如新婦。空目送塞鴻去。

又(端午)

深院榴花吐。畫簾開綵衣紈扇。午風清暑。兒女紛紛新結束。時樣釵符艾虎。早已有游人觀渡。老大逢場慵作戲。任白頭年少爭旗鼓。溪雨急。浪花舞。靈均標致高如許。憶生平既紉蘭佩。又懷椒糈。誰信騷魂千載後。波底垂涎角黍。又說是蛟饞龍怒。把似而今醒到了。料當年醉死。

差無苦。聊一笑。弔千古。

又（九日）

湛湛長空黑。更那堪。斜風細雨。亂山如織。老眼平生空四海。賴有高樓百尺。看浩蕩。千崖秋色。白髮書生神州淚。儘淒涼。不向牛山滴。追往事。去無迹。少時自負凌雲筆。到如今。春華落盡。滿懷蕭瑟。常恨世人新意少。愛說南朝狂客。把破帽。年年拈出。若對黃花孤負酒。怕黃花也笑人岑寂。鴻北去。日西匿。

又（遊水東周家花園）

溪上收殘雨。倚危闌。薄綿乍脫。日陰亭午。鬧市不知春色處。散在荒園廢墅。漸小白。長紅無數。客子雖非河陽令。也隨緣。暫作鶯花主。那可負。甕中醕。碧雲四合千巖暮。恨匆匆。余方有事。子姑歸去。趁取羣芳未搖落。暇日提魚就煮。歎激電。光陰如許。回首明年何處在。問桃花。尙記劉郎否。公莫笑。醉中語。

又（郡會聞妓歌有感）

妾出於微賤。少年時。朱絃彈絕。玉笙吹徧。粗識詩家關雎亂。羞學流鶯百轉。總不涉。閨情春怨。誰向西鄰公子說。要珠鞍。迎入梨花院。身未動。意先懶。主家十二樓連苑。那人人。靚妝按曲。繡簾初捲。道是畫堂簫管唱。笑殺街坊拍袞。回首望。侯門天遠。我有平生離鸞操。頗哀而不慍。

微而婉。聊一奏。更三嘆。

又（端午）

思遠樓前路。望平隄十里湖光。畫船無數。綠蓋盈盈紅紛紛。葉底荷花解語。鬪巧結同心雙縷。尙有經年離別恨。一絲絲總是相思處。相見也。又重午。清江舊事傳荆楚。嘆人情千載如新。尙沈菰黍。且盡尊前今日醉。誰肯獨醒弔古。泛幾盞菖蒲綠醕。兩兩龍舟爭競渡。奈珠簾暮捲。西山雨。看未足。怎歸去。

卜算子

（手植海棠盛開。風雨作祟。輒作小詞二首。）

盡是手成持。合得天饒借。風雨于花有甚讎。作意相陵藉。做暖逼教開。做冷催教謝。不負明年花下人。只負栽花者。

又

片片蝶衣輕。點點猩紅小。人道東君不惜花。百種千般巧。朝見樹頭繁。暮見樹頭少。人道東君果惜花。雨打風吹了。

一翦梅（中秋解宜春郡印）

陌上行。人怪府公。還是文窮。還是詩窮。下車上馬太匆匆。來是春風。去是秋風。銜階免得管兵農。嬉到昏鐘。睡到齋鐘。不須提岳與知宮。喚作溪翁。喚作山翁。

木蘭花慢（癸卯生日）

病翁將耳順。牙齒落。鬢毛疏。也慚愧君恩。放還田舍。免詣公車。兒時某邱某水。到而今老矣。可樵漁。寶馬華軒無分。塞驢破帽如初。浮名箕斗竟成虛。磨折總因渠。帝錫余別號。江湖聲叟。山澤仙臞。尊前未宜感慨。事猶須看歲晏何如。衛武耄年作戒。伏生九十傳書。

又（送鄭伯昌）

古人吾不見。君莫是鄭當時。更築就山房。躬耕谷口。名動京師。諸公任他袞袞。與杜陵野老共襟期。有客至門先喜。得錢沽酒何疑。昔年聯轡柳邊歸。陳迹恍難追。況種桃道士。看花君子。回首皆非。相逢故人問訊。道劉郎老去久無詩。把做一場春夢。覺來莫要尋思。

又（丁未中秋）

水亭凝望久。期不至。擬還差。隔翠幌銀屏。新眉初畫。半面猶遮。須臾淡烟薄靄。被西風掃盡不留些。失了白衣蒼狗。奪回雪兔金蟾。乘雲徑到玉皇家。人世鼓三挝。試自判此生。更看幾度。小住爲佳。何須如鉤似玦。便相將只有半菱花。莫遣素娥知道。和它髮也蒼華。

又高樓（戊戌自壽）

南嶽後。累任作祠官。試說與君看。仙都玉局纔交卸。新銜又管華州山。怪先生。吟膽壯。飲腸寬。去歲擁旌旗。稱太守。今歲帶笭箠。稱漫叟。慵入鬧。慣投閒。有時拂袖尋種放。有時攬枕就陳

搏任旁人嘲潦倒笑癡頑。

又〔再題周登樂府〕

周郎後直數到清真。君莫是前身。八音相應。諸韶樂。一聲未了。落梁塵。笑而今。輕郢客。重巴人。只少個。綠珠橫玉笛。更少個。雪兒彈錦瑟。欺賀晏。壓黃秦。可憐樵唱。并菱曲。不逢御手與龍巾。且醉眠。篷底月。甕閒春。

臨江仙（縣圃種花。或刻種海棠作）

落魄長官江海客。少豪萬里尋春。而今憔悴向溪濱。斷無觴詠興。惟有簿書塵。手插海棠三百本。等閒妝點芳辰。他年絳雪映紅雲。丁寧風與月。記取種花人。

又（庚子重陽。余以漕攝帥。會前帥唐伯玉。前漕黃成父。于越王臺。明年是日。寓海豐縣驛作。）

去歲越王臺上飲。席間二客如龍。憑高弔古壯懷同。馬嘶千嶂暮。樂奏半天中。今歲三家村市裏。故人各自西東。菊花時節酒尊空。可憐雙雪鬢。禁得幾秋風。

又（潮惠道中）

不見仙湖能幾日。塵沙變盡形容。夜來月冷露華濃。都忘茆屋下。但記畫船中。兩岸綠陰猶未合。更須補竹添松。最憐幾樹木芙蓉。手栽纔數尺。別後爲誰紅。

又（已酉和寶之燈夕）

玉遂鈿車當日事。東塗西抹都曾。等閒曲子壓和凝。（曲子相公）縱遊非草草。已醉強惺惺。今向三家村送老。身如罷講吳僧。高樓百尺不須登。半爐燒葉火。一鏡勘書燈。

昭君怨（牡丹）

曾看洛陽舊譜。只許姚黃獨步。若比廣陵花。太虧他。舊日王侯園圃。今日荊榛狐兔。君莫說中州。怕花愁。

又（瓊華）

后土宮中標韻。天上人間一本。道號玉真妃。字瓊姬。我與花曾半面。流落天涯重見。莫把玉簫吹。怕驚飛。

清平樂（五月十五夜歡月）

纖雲掃迹。萬頃玻璃色。醉跨玉龍游八極。歷歷天青海碧。水晶宮殿飄香。羣仙方按霓裳。消得幾多風露。變教人世清涼。

又（同前）

風高浪快。萬里騎蟾背。曾織姮娥真體態。素面元無粉黛。身游銀闕珠宮。俯看積氣濛濛。醉裏偶搖桂樹。人間喚作涼風。

又（頃在維揚陳師文參議家。舞姬絕妙。賦此）

宮腰束素。只怕能輕舉。好築避風臺護取。莫遣驚鴻飛去。一團香玉溫柔。笑顰俱有風流。貪與簫郎眉語。不知舞錯伊州。

又(別意)(丹陽舟中作)

休彈別鶴。淚與絃俱落。歡事中年如水薄。懷抱那堪作惡。昨宵月露高樓。今朝烟雨孤舟。除是無身方了。有身長有閒愁。

長相思(惜梅)

寒相催。暖相催。催了開時催謝時。丁寧花放遲。角聲吹。笛聲吹。吹了南枝吹北枝。明朝成雪飛。

又(寄遠)

朝有時。暮有時。潮水猶知日兩迴。人生長別離。來有時。去有時。燕子猶知社後歸。君行無定期。

又(餞別)

風瀟瀟。雨瀟瀟。相送津亭折柳條。春愁不自聊。烟迢迢。水迢迢。準擬江邊駐畫橈。舟人頻報潮。

又

煙淒淒。草淒淒。野火原頭燒斷碑。不知名姓誰。
印纍纍。冢纍纍。千萬人中幾個歸。榮華朝露

又

勸一杯。復一杯。短鍾相隨死便埋。英雄安在哉。
眉不開。懷不開。幸有江邊舊釣臺。拂衣歸去

菩薩蠻（戲林推）

小鬟解事高烧燭。羣花圍繞樗蒲局。道是五陵兒。風騷滿肚皮。
玉鞭鞭玉馬。戲走章臺下。笑殺灞橋翁。騎驢風雪中。

玉樓春（戲呈林節推鄉兄）

年年躍馬長安市。客舍似家家似寄。青錢換酒日無何。江燭呼盧宵不寐。
易挑錦婦機中字。難得玉人心下事。男兒西北有神州。莫酒水西橋畔淚。

生查子（元夕戲陳敬叟）

繁燈奪霽華。戲鼓侵明發。物色舊時同。情味中年別。
淺畫鏡中眉。深拜樓西月。人散市聲收。漸入愁時節。

憶秦娥（暮春）

遊人絕。綠陰滿野。芳菲歇。芳菲歇。養蠶天氣。采茶時節。枝頭杜宇啼成血。陌頭楊柳吹成雪。吹成雪。淡煙微雨江南三月。

又(上巳)

脩禊節。晉人風味終然別。終然別。當時賓主。至今清絕。等閒寫就蘭亭帖。豈知留與人間說。人間說。永和之歲暮春之月。

又

泥滑滑。一聲聲喚征鞍發。征鞍發。客亭楊柳。不禁攀折。苟郎衣上香初歇。蕭娘心下書難說。書難說。霎時吹散一生愁絕。

又(感舊)

春醒薄。夢中毬馬豪如昨。豪如昨。月明橫笛。曉寒吹角。古來成敗難描摸。而今卻悔當時錯。當時錯。鐵衣猶在。不堪重著。

又

梅謝了。塞垣解凍鴻歸早。鴻歸早。憑伊問訊。大梁遺老。浙河西面邊聲悄。淮河北去炊煙少。炊煙少。宣和宮殿。冷煙衰草。

鵲橋仙(戊戌生朝)

金風淅淅。銀河淡淡。長少羣賢畢會。平生心事麴生知。怪此夕惺惺相對。玄花生眼。新霜點鬢。不肯遮藏老態。人間何處有仙方。擘劃得二三百歲。

踏莎行（甲午重九牛山作）

日月跳丸。光陰脫兔。登臨不用深懷古。向來吹帽插花人。盡隨殘照西風去。老矣征衫。飄然客路。炊煙三兩人家住。欲攜斗酒答秋光。山深無覓黃花處。

水調歌頭（和西外判宗湖樓韻）

君看郭西景。渾不減孤山。飛樓突兀百尺。輪奐侈前觀。絕唱新詞寡和。墮淚舊碑無恙。往事付驚瀾。不見遼鶴返。惟對水鷗閒。又何必。珠翠盛。管弦懽。唾壺塵尾瀟灑。領客上高寒。丞相功存宗廟。祭酒義兼家國。世事尙相關。風月寓意耳。莫作晉人看。

又（遊蒲澗。追和崔菊坡韻。○余頃爲儀真郡督郵。白事維揚。崔公銳欲羅致。屬先受制置使李公之辟。崔公

始聘洪公舜俞入幕。後二十五年。奉使嶺外。拜公祠像。俯仰今昔。輒和公所作水調以寓悲慨。）

敕使竟空返。公不出梅關。當年玉座記憶。仄席問平安。羽扇尉佗城上。野服仙游閣下。遼鶴幾時還。賴有蜀耆舊。健筆與書丹。青油士。珠履客。各凋殘。四方蹙蹙靡騁。獨此尙寬閒。丞相祠望何處。太傅石碑墮淚。木老瀑泉寒。往者不可作。置酒且登山。

又（再和（喜歸））

遣作嶺頭使。似成玉門關。來時送者舉酒。珍重祝身安。街畔小兒拍笑。馬上是翁。嬰鑠頭與璧俱還。何處得仙訣。髮白顏猶丹。屋茆破。籬菊瘦。架籤殘。老夫自計甚審。忙定不如閒。客難楊雄拓落。友笑王良來往。而汗背芒寒。再拜謝不敏。早晚乞還山。

又（三和）解印。有期戲作。

老子頗更事。打透利名關。百年擾擾于役。何異入槐安。夢裏偶然得意。醒後纔堪發笑。蟻穴駕車還。恰佩南柯印。髭髥穀曾丹。客未散。日初昧。酒猶殘。向來幻境安在。回首總成閒。莫問浮雲起滅。且跨剛風遊戲。露冷玉簫寒。寄語抱朴子。候我石樓山。

又（四和）八月上澣。解印別同官席上賦。

半世慣歧路。不怕唱陽關。朝來印綬解去。今夕枕初安。莫是散場優孟。又似下棚傀儡。脫了戲衫還。老去事多忘。公莫笑師丹。筆端花。胸中錦。兩消殘。江湖水草空曠。何必養天閒。久苦諸君共事。更盡一杯別酒。風露夜深寒。回首行樂地。明日隔雲山。

又（五和）客散。循隄步月而作。

落日幾呼渡。佳夕每留關。有時來照清淺。鬢雪似潘安。一曲親蒙君賜。兩岸更無人迹。惟見鷺飛還。隙地欠栽接。蕉荔雜黃丹。柳全疏。松尙幼。怕摧殘。避人笑我癡計。管鑰費防閑。翁意在平林壑。客亦知夫水月。滿腹貯清寒。賦詠差有愧。赤壁與滁山。

又（六和）次夕，觴客湖上，賦葛仙事。

羈虜問周鼎，柱史出秦關。苦求勾漏何意，身世遠差安。不見跼蹐墮水，時有飛鴻遵渚，樂此久忘還。采藥寓言耳，胸次有靈丹。釣游處，榕葉暗，荻花殘。自翕仙後千載，輸與水鷗閒。我讀內篇未竟，忽被急符驅去，洞閉白雲寒。回首幽子，隱約海中山。

又（七和）十三夜，同官載酒相別，不見月作。

怪事廣寒殿，此夕不開關。林閒烏鵲相賀，暫得一枝安。只在浮雲深處，誰駕長風挾取，明鏡忽飛還。玉兔呼不應，難覓白中丹。酒行深，歌聽徹，笛吹殘。嫦娥老去孤另，離別匹如閒。待得銀盤擎出，只怕玉峯醉倒，衰病不禁寒。卿去我欲睡，辜負此湖山。

又（癸卯中秋作）

老去有奇事，天放兩中秋。使君飛榭千尺，縹緲見麟洲。景物東徐城上，歲月北征詩裏，圓缺幾時休。俯仰慨今昔，惟酒可澆愁。風露高，河漢澹，素光流。賈胡野老相慶，田海十分收。競看垣娥金鏡，爭信仙人玉斧，費了一番修。衰晚筆無力，誰伴賦黃樓。

哨徧（昔坡公以盤谷序配歸來詞，然陶詞既隱括入律，韓序則未也。暇日游方氏龍山別墅，試效顰爲之，俾主人刻之崖云。）

主人刻之崖云。

勝處可宮，平處可田。泉土尤甘美，深復深，路絕佳人稀。有人兮，盤旋於此，送子歸。是他隱居求

志是要明主媒常世。嗟此意誰論。其言甚壯。孔顏猶有遺旨。大丈夫之被遇于時。入坐廟朝。出旗麾。列屋名姬。夾道武夫。滿前才子。噫。有命存焉。吾非惡此而逃之。富貴人所欲。如之何。幸而致向茂樹堪休。清泉可濯。谷中別有閑天地。鱸細於絲。蔗甜似蜜。采於山。釣於水。大丈夫不遇時之所爲。唐處士依稀是吾師。覺山林尊如朝市。五侯門下賓客。擾擾趨形勢。嗟盤之樂。誰爭子。所占斷。千秋萬歲。呼僮秣馬。更膏車。便與君從此逝矣。

賀新郎

吾少多奇節。頗擲揄玉關定遠。壺頭新息。一劍防身行萬里。選甚南溟北極。看塞雁銜來秋色。不但梨棋夸妙手。管城君亦自無勁敵。終賈輩。恐難匹。酒腸詩膽新來窄。向西風登高望遠。亂山斜日。安得良弓并快馬。聊與諸公角力。漫醉把闌干頻拍。莫恨寒蟬離海晚。待與君乘燭游。今夕歡。易買健難得。

又（杜子昕觀歌）

盡說番和漢。這琵琶依稀似曲。巖然絃斷。作麼一年來一度。欺得南人技短。歎幾處城危如卵。元凱後身居玉帳。報□□休作尋常看。佈嚴令。運奇算。開門決鬪雌雄判。笑中宵奚車鼉屋。獸驚禽散。箇箇巍冠橫塵柄。誰了君王此段也。莫靠長江能限。不論周郎并幼度。便仲尼復起。嗟微管。馳露佈。築京觀。

又（跋唐伯玉奏稿）

宣引東華去。似常年文皇親擢馬周徒步。殿上風霜生白簡。下殿扁舟已具。怎不與官家留住。古有一言腰相印。誰教他滿篋嬰鱗疏。還笏退。不迴顧。新來邊報猶飛羽。問諸公可無長策。少寬明主。攀檻朱雲頭雪白。流落如今底處。但一片丹心如故。賴有越臺堪眺望。那中原莫已平安否。風色惡。海天暮。

又（送唐伯玉還朝）

驛騎聯翩至。道臺家籌邊方急。酒行姑止。作麼攜將琴鶴去。不管州人墮淚。富與貴平生無味。可但紅塵難着脚。使山林未有安身地。搔白髮。兀相對。前身小范疑公是。憶當年天章閣上。建明尤偉。慶曆諸賢方得路。便不容他老子。須著放涎州城裏。一句殷勤牢記取。在朝廷最好圖西事。何必向玉關外。

又（送黃成父還朝）

飛詔從天下。道中朝名流欲盡。君王思賈。時事祇今堪痛哭。未可徐徐俟駕。好著手扶將宗社。多少法筵龍象衆。聽靈山祝付些兒話。千百世。要傳寫。子方行矣乘驄馬。又送它江南太史。去游甌廈。老我伴身惟有影。倚徧風軒月榭。悵玉手何時重把。君向柳邊花底問。看貞元朝士誰存者。桃滿觀。幾開謝。

又（戊戌壽張見君九月十八日）

南國秋容晚曉。寒輕芙蓉臺榭。拒霜池館。試向壺山堂上望。萬頃黃雲刈徧。總喫著君侯方寸。不要漢庭誇擊斷。要史家編入循良傳。春脚到。福星現。家家香火人人願。要還他慶元狨座。建炎蟬冕。穩奉安輿迎兩國。誰謂山遙水遠。福壽比河沙難算。來歲而今黃花節。早驂鸞入侍瑤池宴。風浩蕩。海清淺。

又（宋庵訪梅）

鵲報千林喜。還猛省謝家池館。早寒天氣。要與瑤姬敍離索。草草杯盤籍地。悵減盡何郎才思。不願玉堂并金屋。願年年歲歲花間醉。餐秀色。挹高致。西園飛蓋東山妓。問何如半山雪裏。孤山煙外。管甚夜深風露冷。人與長餅共睡。任翠羽枝頭多事。老子平生無他過。爲梅花受取風流罪。簪白髮。莫教墜。

又（和人詠茶蘼）

曾與瑤姬約。恍相逢翠裳搖曳。珠鞵聯絡。風露青冥非人世。攬結玉龍驂鶴。愛萬朵千條纖弱。禱祝花神憐惜取。到開時晴雨須斟酌。枝上雪。莫銷卻。惱人匹似中狂藥。凭危闌燭光交映。樂老遙作。身上春衫香熏透。看到參橫月落。算茉莉猶底一著。坐有巖山王郎子。倚玉簫度曲。難爲醉。君不飲。鑄成錯。

又（用前韻賦黃茶蘼）

想赴瑤池約。向東風、名姬駿馬。翠轡金絡。太液池邊鵲羣下。又似南樓呼鶴。畫不就、穠纖嬌弱。羅帕封香來天上。瀉銅盤、沆瀣供清酌。春去也。被留卻。芳魂再反應無藥。似詩詠、綠衣黃裏。感傷而作。愛惜尙嫌蜂採去。何況流鶯蹴落。且放下、玳簾遮著。除卻江南黃九外。有何人敢與花酬酢。君認取、莫教錯。

又（再用約字）

淺把宮黃約。細端相、普陀煙裏。金身珠絡。萼綠華輕羅襪小。飛下祥雲仙鶴。朵朵賽蜂腰纖弱。已被色香撩病思。儘鵝兒酒美無多酌。看不足。怕殘卻。人間難得傷春藥。更枝頭、流鶯喚起。少年狂作。留取姚家花相伴。羞與萬紅同落。未肯讓、蠟梅先著。樂府今無黃絹手。問斯人、清唱何人酢。休草草、認題錯。

又（郡宴和韻）

草草池亭宴。又何須、珠璣絡臂。琵琶遮面。賓主一時詞翰手。倏忽龍蛇滿案。傳寫處、塵飛鶯囀。但得時平魚稻熟。這腐儒、不用青精飯。陰霧掃。霽華見。使君償了豐年願。便從今、也無敲朴也。無廚傳。試拂籠紗看壁記。幾箇標名渠觀。想九牧、聞風爭羨。此老飽知民疾苦。早歸來、載筆熏風殿。詩有賦。諷無勸。

又（再和前韻）

夢斷鈞天宴。怪人間、曲吹別調。局翻新面。不是先生瘖啞子。怕殺烏臺舊案。但掩耳、蟬嘶禽囀。老去把茅依地土。有瓦盆盛酒。荷包飯。停造請免朝見。少狂誤發功名願。苦貪他生前死後。美官佳傳。白髮歸來還自笑。管轄希夷古觀。看一道、冰銜堪羨。妃子將軍噴未已。問匡山何似。金鑾殿。休更待。杜鵑勸。

又（題蒲澗寺）

風露驅炎毒。記僊翁飄然謫墮。吹笙騎鵠。歷歷漢初秦季事。山下瓜猶未熟。過眼見羣雄分鹿。想得拂衣游汗漫。試回頭、劉項俱蠻觸。斫鯨鱸。脯鱗肉。越人好事因成俗。擁遨頭如雲士女。山南山北。問訊先生無恙否。齊魯干戈滿目。且游戲、扶胥黃木。不是世無瓜樣棗。便有來肯飽。癡兒腹。聊舉酒笑相屬。

又（王質之喜予出嶺。命愛姬歌新詞以相勞。輒次其韻。）

此腹元空洞。少年時、諸公過矣。上天吹送。老大被它禁害殺。身與浮名孰重。這般笛休休拈弄。綵筆擲還殘錦去。（用江淹飽詔事）願今生來世無妖夢。且飯犢莫吞鳳。新來暗啞如翁仲。羨王郎驂鸞縹緲。玉簫吹動。應笑夔州村裏女。灸面生愁進奉。要絕代傾城安用。今古何人知此理。有吾家酒德先生頌。三萬卷漫充棟。

又（蒙恩主崇禱再用前韻）

主判茅君洞有簷。閒查查喜鵲曉來傳送。幾度黃符披戴了。此度君恩越重。（僕五任祠廟，一南岳二仙都，三玉皇四雲臺，五崇禱）被賀監天隨調弄，做取散人千百歲。笑渠儂一霎邯鄲夢。歌而過鳳兮鳳。灌園織屨希陳仲。問先生加齊卿相可無心動。除卻醴泉中太乙，揀箇名山自奉。那捷徑輸它藏用有耳，不曾聞黜陟免教人貶駁。徂徠頌服蘭佩結茅棟。

又（三和）

謫下神清洞。更遭它擲揄黠鬼。路旁遮送。薄命書生雞肋爾。却笑尊拳忒重。破故紙誰教繙弄。一枕茅簷春睡美。便周公大聖何須夢。門前客任題鳳。卜鄰羊仲并求仲。願春來西疇雨足。土膏黎動白髮巡官占歲稔。不問京房翼奉。棹與甕從今無用醉。與老農同擊壤。莫隨人頭獻嘉禾。頌在陋巷勝華棟。

又（生日用實之來韻）

鬢雪今千縷。更休休癡心默望。故人明主。晚學瞿聃無所得。不解飛昇滅度。似曉鼓琴琴搗五。散盡朝來湯餅客。且烹雞要飯茅容母。怕迴首太行路。麟臺學士微雲句。便尊前周郎復出。審音無誤。安得春鶯雪兒輩。輕拍紅牙按舞也。莫笑儂家蠻語。老去山歌尤協律。又何須手筆如燕許。援琴操促箏柱。

又（再用前韻）

放逐身縑縷。被門前羣鷗戲狎。見推盟主。若把士師三黜比。老子多他兩度。袖手看名場呼五。不會車邊望塵拜。免它年青史羞潘母。勾曲洞。是歸路。平生怕道蕭蕭句。況新來冠欹弁側。醉人多誤。管甚是非并禮法。頓足低昂起舞。任百鳥喧啾春語。欲托朱絃寫悲壯。這琴心脈脈。誰堪許。君按拍。我調柱。

又（實之三和有憂邊之語。走筆答之）

國脈微如縷。問長纓何時入手。縛將戎主。未必人間無好漢。誰與寬些尺度。試看取當年韓五。豈有穀城公付授。也不干。曾遇驪山母。談笑起。兩河路。少時棋折曾聯句。歎而今登樓攬鏡。事機頻誤。聞說北風吹面急。邊上衝梯屢舞。君莫道投鞭虛語。自古一賢能制難。有金湯便可。無張許。快投筆。莫題柱。

又（四用縑字韻爲王實之壽）

萬字如鉄縷。憶王郎丹墀大對。氣爲文主。貴近旁觀俱失色。仰止如天聖度。笑杜牧成名居五。晚面清光猶若諫。似封人懇切言君母。謫塵世。錯行路。當時宜和薰風句。又那知青雲一跌。被才名誤。輸與靈和殿前柳。柔較隨風學舞。怪兩鳥新來停語。不是先生高索價。問何時宰相。先生許。舉杯祝。莫傾柱。

又（實之用前韻爲老者壽嚴答）

身畔無絲縷。但從前練裳練袖。做他家主。甲子一周加二紀。兔走烏飛幾度。賽孔子如來三五。
（徐陵云。小如來五歲。多孔子三年。）鶴髮蕭蕭無可截。要一杯留客慚陶母。門外草欲迷路。朗吟
白雪陽春句。狩夫君驪駒不至。鵲聲還誤。老去聊攀萊子例。倒著斑衣戲舞。記田舍火爐頭語。
肘後黃金腰下印。有高堂未敢將身許。且扇枕莫倚柱。

沁園春（癸卯佛生翌日將曉夢中作。既醒但易數字）

有箇頭陀形等枯株。心猶死灰。幸春山笏賤。無人爭喫。夜爐芋美。與客同煨。何處旛花。忽相導
引。莫是天宮迎赴齋。又疑道向毗耶城裏。講席初開。這邊尙自徘徊。笑那裏紛紛早見猜。有
尊神舊杵。拳麤似鉢。名緇豎拂。喝猛如雷。老子無能。山僧不會。誰誤檀那舉請哉。山中去。便百
千億劫。休下山來。

又（和吳尙書叔永）

我所思兮。延陵季子。別來九春。笑是非浮論。白衣蒼狗。文章定價。秋月華星。獨步岷峨。後身坡
穎。何必荀□有。二仁中朝裏。看叔兮衰斧。伯也絲綸。洛中曾識機雲。記玉立堂堂。九尺身。歎
茗溪漁艇。幽人孤往。雁山馬鬣。弔客離經。宣室釐殘。玄都花謝。回首舊游存幾人。新腔美。堪洗
空恩怨。喚起交情。

又（吳叔永尙書和予舊作再答）

莫羨渠儂。白玉成樓。黃金築臺。也不消顛怪。騎鱗被髮。誰能委由。令鳩爲媒。鬢有一毛。袖閑雙手。只子持螯與把杯。公過矣。賞陳登豪氣。杜牧羶才。便煩問訊張雷。甚斗宿無光。劍不迴想。閣中鳴佩。時攜客去。壁間懸榻。近有誰來。撤我虎皮。讓君牛耳。誰道兩賢相厚哉。中年後。向歌闌易感。樂極生哀。

又（維揚作）

遼鶴重來。不見繁華。只見凋殘。甚都無人誦。何郎詩句。也無人報。書記平安。閭里俱非。江山略是。縱有高樓。莫倚闌。沈吟處。但螢飛草際。雁起蘆間。不辭露宿風餐。怕萬里歸來。雙鬢斑。算這邊贏得。黑貂裘弊。那邊輸了。翡翠衾寒。檄草流傳。吟牋倚閣。開到瓊花亦嬾看。君記取。向中州差樂。塞地無歡。

摸魚兒（用實之韻）

便披蓑荷鋤歸去。何須身着宮錦。與誰共話桑麻事。朱老阮生尤稔。篩樣餅。甕樣醢。長鬚赤腳。供樵飪。清流濁品。盡掃去胸中。置諸膜外。對酒莫辭飲。華胥夢。怕殺人。驚曉枕。疏牕惟月來。闌。一生常被弓旌誤。且告朝家。追寢愁箇甚。君管取。有薇堪采。松堪蔭。茆山再在。幸不是。謀臣。又非世將。免犯道家禁。

一翦梅（余赴廣東實之夜餞于風亭）

東縑宵行十里強。挑得詩囊。拋了衣囊。天寒路滑馬蹄僵。元是王郎。來送劉郎。酒酣耳熱說文章。驚倒鄰牆。推倒胡牀。旁觀拍手笑疏狂。疏又何妨。狂又何妨。

滿庭芳（記夢）

涼月如冰。素濤翻雪。人世依約三更。扁舟乘興。莫計水雲程。忽到一洲奇絕。花無數。多不知名。渾疑是、芙蓉城裏。又似牡丹墀。蓬萊應不遠。天風海浪。滿目淒清。更一聲鐵笛。石裂龍驚。回顧塵寰局促。揮袂去。散髮騎鯨。蘧蘧覺。元來是夢。鐘動野雞鳴。

鷓鴣天（腹疾且睡和朱希真詞）

前度看花白髮郎。平生痼疾是清狂。幸然無事汙青史。省得教人奏赤章。游俠窟。少年場。輸他羣謝與諸王。居人不識庚桑楚。弟子誰從魏伯陽。

又（戲題周登樂府）

詩變齊梁體已澆。香奩新製出唐朝。紛紛競奏桑間曲。寂寂誰知爨下焦。揮綵筆。展紅綃。十分峭措稱妖饒。可憐才子如公瑾。未有佳人敵小喬。

卜算子

亂似盎中絲。密似風中絮。行徧茫茫禹迹來。底是無愁處。好客挽難留。俗事推難去。惟有翻

身入醉鄉愁欲來無路。

木蘭花慢（壽王質之）

瀛洲真學士。爲底事。在紅塵。爲語觸宮闈。沈香亭裏。噴謫僊人。爲親近君側者。見萬言策子。基劉蕡。爲是尙方請劍。漢廷多憚朱雲。君言往事勿重陳。且鬪酒邊身。也不會區區算它甲子。記甚庚寅。爾曹譬如朝菌。又安知老柏與靈椿。世上榮華難保。古來名節如新。

念奴嬌（壽方德潤）

卯君來處。與眉州仙子。依稀同日。一自前朝龔蔡後。頗覺壺山岑寂。誰料端平。繼居遺補。復有斯人出。幅巾林下。姓名玉座長憶。須信諂語尤甘。忠言最苦。橄欖何如密。諸老蕭疏。星欲曉。留取南都鈇壁。洛社自佳。鏡湖雖好。莫問君王乞。年年歲歲。大家同做真率。

又（丙午少師生日）

禁中張謫。苦留公未許。歸尋初服。千載君臣魚有水。不比嚴光文叔。大德中天。客星一夕。草草聊同宿。重來凝碧。依然廣載相屬。過眼夸奪紛紛。浮雲野馬。幾度棋翻局。客話鳳池三入事。洗耳湖光一曲。伯始泉荒。稗圭圃冷。占斷西風菊。年年歲歲。金英常泛芳醪。

後村別調終

後村別調跋

致淳祐辛丑八月御批云。劉克莊文名久著。史學尤精。可特賜同進士出身。由是負一代盛名。偶有題跋。後人輒以爲定衡。所撰別調一卷。大率與辛稼軒相類。楊升庵謂其壯語足以立懦。余竊謂其雄力足以排寡。云。湖南毛晉識。

中國文學珍本叢書

第一輯 第四十種


中華民國廿五年六月初版

宋六十一名家詞丁集

普及本實價四角
特印本實價五角五分

撰著者 毛子晉
校點者 施蜚存
主編者 施蜚存
發行人 貝葉山房
總經售 張靜廬
上海雜誌公司

上海總店：四馬路三二四號
廣州支店：永漢北路二三九號
南京支店：太平路一二四八號
開封支店：中山北街二八四號
雲南支店：土主廟街四七號



初版本1——2500本

題630

中華民國廿五年六月拾八日收到

